

Allannguutissatut siunnersuut

uunga

Uunga siunnersuut: Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaata allanngortinneqarnera pillugu Inatsisartut inatsisaat.

Inuussutissarsiornermut Aatsitassanullu Ataatsimiititaliami amerlanerussuteqartunit Inuit Ataqaatigiit, Siumup Atassutillu ilaasortaataaani aappassaaneerinninnermut saqqummiunneqartoq.

§ 1-imut

1. § 1-imi § 8, imm. 2 imatut oqaasertalerneqassaaq:

” Imm. 2. Tapiiffigineqarnissamik neriorsuummik tunniussisoqarsinnaanngilaq, pissarsisussaq imaluunniit pisortaaneqarfimmi siulersuisuniluunniit inuit aqutsisuusut akileraartarnermi inatsimmik annertuumik unioqqutitsisimasutut imaluunniit Kalaallit Nunaanni pinerluttulerinermi inatsimmi aningaasarsiornermi pinerluuteqarnermut aalajangersakkanik unioqqutitsisimasutut pineqaatissinneqarsimappata imaluunniit pisortanut akiitsoqarpata annertuunik akiligassanngorsimasunik.”

Siunnersuummut nassuiaatit

Nalinginnaasumik nassuiaatit

Inatsisartut inatsisaanni atuuttumi § 8, imm. 2-mi aalajangersarneqarpoq tapiiffigineqarnissamik neriorsorneqarsinnaassagaanni pissarsisussaq imaluunniit aqutsisuni imaluunniit siulersuisuni inuk aqutsisuusq akileraartarnermi inatsimmik annertuumik unioqqutitsisimasutut imaluunniit Kalaallit Nunaanni pinerluttulerinermi inatsimmi aningaasarsiornermi pinerluuteqarnermut aalajangersakkanik unioqqutitsinermut pineqaatissinneqarsimassanngitsoq imaluunniit pisortanut amerlasuunik akiitsoqassanngitsoq.

Inatsisissatut siunnersuummi Naalakkersuisunit saqqummiunneqartumi pissarsisussap imaluunniit aqutsisuni imaluunniit siulersuisuni inuup aqutsisuusup pisortanut amerlasuunik akiitsoqannginnissaanik piumasaqaat peerneqarpoq.

Allannguutissatut siunnersuutip kingunerissavaa § 8, imm. 2-mi tapiiffigineqarnissamik neriorsuuteqarsinnaanermut piumasaqaatit atuuttut ingerlateqqinneqassammata, pisortanilli akiitsut eqqarsaatigalugit oqilisaassisoqarluni, pisortanut annertuunik akiligassanngorsimasunik akiitsoqarneq kisimi qinnuteqartup tapiiffigineqarsinnaaneranut aporfiulissalluni.

Innuttaasut pisortanut akiitsui annertoqaat ajornarsorsiullu annertusiartortuarluni, akiitsullu ullumikkut 1 milliard kr.-it sinnersimallugit. Innuttaasunut akiitsuminnik ilungersorlutik akiliiniartartunut eqqortuliornerrussanngilaq pisortat innuttaasunut suliffeqarfinnullu akiitsut eqqarsaatigalugit pisussaaffimminnik naammassinnissimannngitsunut taarsigassarsisisassappata. Allannguutissatut siunnersuut ilaatigut tamanna tunngavigalugu saqqummiunneqarpoq.

Allannguutissatut siunnersuut ass. inuusuttut aallarnisaasut ilinniagaqarnerminnullu atatillugu annertuumik akiitsoqalersimasut – ilinniarnermut atatillugu akiitsut akilersornissaannut pisussaaffimmik sumiginnaasimannngippata - ass. annikitsunik taarsigassarsinikkut tapiiffigineqarsinnaanerisa mattunneqannginnissaannik kissaateqarnermik tunngaveqarpoq.

Allannguutissatut siunnersuummi aalajangersakkanut ataasiakkaanut nassuiaatit

Nr. 1-imut

Allannguutissatut siunnersuutip kingunerissavaa § 8, imm. 2-mi tapiiffigineqarnissamik neriorsorneqarsinnaanissamut piumasaqaatit atuuttut ingerlatiinnarneqassammata, pisortanilli akiitsut eqqarsaatigalugit oqilisaassisoqarluni, pisortanut annertuunik *akiligassannngorsimasunik* akiitsoqarneq kisimi qinnuteqartup tapiiffigineqarsinnaaneranut aporfiulissalluni.

Taamaalilluni pisortanut akiitsoqartoqarpat annertuunik *akiligassannngorsimannngitsunik*, tamanna aporfiussanngilaq qinnuteqartup ingerlatsinissamut patajaatsumik pilersaarutillip tapiiffigineqarsinnaanissaanut.

Pisortanut akiitsut akiligassannngortutut isigineqartarput piffissamit pisortanut akiitsut akilerneqareersimaffissaannit aallartittumik. Akilersuinissamik isumaqatigiissuteqartoqarsimatillugu akiitsut akiligassannngorsimasutut isigineqartarput akilersuinissamik isumaqatigiissut malinneqarsimannngippat.